



Grupa Bal populer
SĒLVA - S. CRISTINA

Gherdëina

nr. 50 / 23 de dezember 2006

LA USC
DI LADINS

Ce bel a balé

**Presidënt nuef y cunsëi nuef
per la Grupa de Bal populer
Sëlva/S. Cristina. N à cialà de
reviers a n ann de atività**

Lies - N venerdì ai 8 de dezember se à i cumëmbri dla Grupa de Bal populer Sëlva/S. Cristina inò ancuntà per si reunion generela. Tla sala dla proes dla grupa à l presidënt da dant Andreas Delago saludà duc chëi che fova prejenc: balarins, sunadëures y l fundadëur dla grupa Bruno Riffeser. La sëira à scumencià cun na blòta prejentazion Power Point fata da Matthias Weithaler, che à mustrà fotografies de dut chël che l ie unì fat ntan l ann. Jita inant iela pona cun la relazion dl cassier Martin Zingerle, che à nce nsenià i bai ti ultimi doi ani. Tëut la parola à nce Bruno Riffeser, che à laudà dassënn la grupa per coche la ie inventeda. Al mumënt cumpedons 16 mutans y 9 mutons, de ndut 23 balarines y balarins y doi sunadëures. Chëst ann iel unì tëüt su mo cater mutons (Luca Comploj, Andreas Insam, Christian Rabanser y Diego Colleselli) y una na muta (Carmen Urthaler). Ultimamënter à i mutons dla grupa mparà ite n valgun "Schuhplattler" che i à nce bele purtà dant pra la ultima raprejentazions.

Vela dl cunsëi nuef

Nsci iesen nce ruvei al mumënt



La Grupa de Bal de Sëlva/S. Cristina a Dresden.

tan aspità dai cumëmbri, chël dla vela de n cunsëi nuef y de n presidënt nuef, davia che Andreas Delago à dat ju si ncëria do bën 4 ani che l ie stat a cë dla grupa. Te cunsëi ie unic litei: Luca Runggaldier (che à giapà l plu stimes), Luca Comploj, Anna Demez (nciarieda per la trohtes), Alexia Demez (scrivana), Marion Mussner y Diego Colleselli (nosc sunadëur che vën da Corvara ca). Coopteda ie unida Stefanie Runggaldier, che fej la cassiera y che nsënia ju i balarins y l presidënt nuef ie Martin Zingerle.

Uneranzes y ringraziamënc

Na uneranza à pudù pië do i plu lezitënc, che ie unic l plu iedesc a proa: tlo se trätel pra la mutans de

Marion Mussner y pra i mutons de Luca Runggaldier.

N bel cheder ti iel unì sëurandat a Barbara Senoner, che lascia la grupa do bën 14 ani de atività. D'autri cumëmbri che à lascià ntan l ann ie Michela Delago, David Senoner, Helga Sinn y Peter Lardschneider. N gra a d'ëi per si gran cuntribut te nosta lia.

Fotografies, nformazions y d'auter pudëis udëi sun nosta plata www.volkstanzgruppe.org. Rengrazion de cuer l vedl cunsëi y l ex-presidënt Andreas Delago per dut chël che i à fat.

Al cunsëi nuef y al presidënt permò lità ti mbincions n bon lëur y che i se tole a cuer si ncëria.

*Grupa de Bal populer
Sëlva/S. Cristina*



Provincia Autonoma de Bolzano - Südtirol
Cultura Ladina

Str. Mëisules 146 - I-39048 Wolkenstein (BZ)
Tel. 0471 793288 - Cell. 349 7515134
E-mail: sendav@net.it

Raiffeisenkasse Wolkenstein K/K 00030000415-4, ABI 08238, CAB 58890, CIN: T

Gröden/Val Gardena



Dolomites